

2 Timoteo

Jachuayama

1 ¹ Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entsanga jábuayenama Bëngbe Bëtsabe šbuachenánama, ntšamo cha inétsamama entsanga chë nyetsca tescama yomna tšabe vida chamotsebmoma; y chca vida montsebmoma Cristo Jesúseftaca cánÿiñe mo canÿacá bétsemnayeca. ² Atše quem tsbuanácha cbontsabobiamná, acbiamá Timoteo, aca mo atšbe bonshana uaquiñacá, Crístbeñe condošbuachema. Atše séntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ácebeñe tšabe bendicionënga chaotsemnana, chata ácbioye chacmolastemama, y acbe ainaniñe tšabe ebionana chacotsebmoma.

Ndoñe ntsëuatjana entsángbeñe Jesucristbiamá jóyebuambayama

³ Sempre Bëngbe Bëtsáftaca tsencuénta ora, acbiamá sëndbétsenojuabnaye, y acbiamá sëndbétsatschuanaye bnëté y ibeta; y Bëngbe Bëtsá endmëna nda atše sëndëservena, ainánaca jtsejuabnayëse y jtsetatšëmbëse, ntšamo atše stsamcá tšabá bétsemnana, cachcá ntšamo atšbe bëts taitanga tmojanmcá. ⁴ Atše sëndbëtétenojuaboye ntšamo aca,

chocana atše séntanabo ora shëchbuiye tconjanoperdema, y chíyeca atše tša séntseboše aca jtétinÿama, atše puerte oyejuayá chaitsemnana. ⁵ Bëngbe Bëtsá acbiamá sëndbatschuaye, er atše sëndbátenojuaboye aca Jesucristbeñe ndegombre ošbuáchiyana condpomnana. Natsana, acbe bëts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndétatšëmbo.

⁶ Chíyeca sempre cochtsantješna quem uámána soyama: Mo nda canÿe shinÿañe tojtsajuinÿinÿnacá, chentše sempre chaotsoiñama, cachcá aca, chë Bëngbe Bëtsá tcmojatšeta obenana tšabe soyënga jamama, sempre cochtsinÿena. Chë obenana aca conjanóyëngacñe, atšbe cucuatšënga acbe bestšašniñe sënjanjajó y Bëngbe Bëtsá acbiamá sënjanimpadá ora. ⁷ Er Bëngbe Bëtsá tonjama bëngbe ainaniñe Uámána Espíritu chaotsemándama, uatjana ndoñe ntsebmoma, ndayá obenana bënga chamotsebmoma, bonshánana Bëngbe Bëtsabiamá y nyetscangbiamá chamotsebmoma, y cabënga jenomándama chamotsobenama.

⁸ Chíyeca, ndoñe cattšëuatja entsanga jáuyanama, ntšamo tcojinÿe y cojtsetatšëmbcá Bëngbe Utabnabiamá ndegombre bétsemnana; ni atšbiamá ndoñe cattšëuatja, atše cárceloye

sëndutámenama, chabiama oservena causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átseftaca y ínÿengaftaca, entsànga tšabe noticiënga abuaiyinye causa. ⁹Bëngbe Bëtsá endmëna nda bënga šojatsebacá, y šojáchembo jtsiyenama mo chábinga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóseyeca y bëngbe tšabiama juabna bómnayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiana jamama sóyeca. ¹⁰Y mora, Bëngbe Atsebacayá Jesucristo tojáboyeca, Bëngbe Bëtsá šojinÿanÿé cha bëngbe tšabiama juabna yobomnama. Jesucristo tonjama, entsànga nÿetsca tescama obanënga ndoñe chamondétsemnama, y tonjama bënga chamotsetatšëmbuama, chë tšabe noticiënga chabiama jouenëse y joyeunayëse, bënga chë nÿetsca tescama yomna tšabe vida mochjábomnama, ndoñe nÿe jopochócama cuerpënguiñe.

¹¹Bëngbe Bëtsá šojanábuayana tšabe noticiënga entsànga jábuayenama, Jesucristbe ichmoná jtsemnama y entsànga jabuátambama. ¹²Chë causa, atšë mora cárceloca quem soyënga séntsesufrina; pero chama atšë ndoñe quetsátëuatja, er atšë sëndétatšëmbo ndábeñe atšë stsošbuáchema, y corente sëndétatšëmbo cha yobena jtsinÿenana ndayá šojabonÿecá, chë ndaytë cha yochjésabëntscuana.

¹³Nÿets tempo, chë ndegombre buayenánana, ndayá átšbentšana tconjanuencá, entsànga cochtsabuaiyinye, entsànga jtsinÿanÿayëse aca Jesucristbeñe

icošbuáchema, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúseftaca cánÿiñe mo canÿacá bëtsemnayeca. ¹⁴Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

¹⁵Ntšamo ya condétatšëmbcá, nÿetsca ošbuáchiyënga Asia luaroquënga cachcá šmonjesonÿá, y chentšë bontsemna Figelo y Hermógenes. ¹⁶Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atšë cárceloye utámenama cha ndoñe quenjatëuatja. ¹⁷Masna, Romoye tojabánashjango ora, cha botamana šojánguango y šonjáninÿena. ¹⁸Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condétatšëmbo ntsachetšá Onesíforo Efeso puebloca šonjanéjabuachama.

Jesucristbiana canÿe tšabe soldado

2 ¹Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebomna. ²Ntšamo ba entsàngbe delante šconjoyeunacá, cach buayenánana, boyabásenga nÿetscañe tšabe palabra bomnënga cochjábanÿiye, y chamotsobena ínÿyënga cachcá jabuátambama.

³Aca, chë bënga fséndbomna padecena soyëngama jasúfriama chacmojtsemna ora, Jesucristbe soyëngama entsànga abuaiyinye causa, ainaniñe bëtš añemo cochtsebomna, mo canÿe tšabe soldadcá, cha chabe mándayabiama

jasúfriana. ⁴Ndocna soldado ntjatanana shjoca soyènguiñe vida jtsebomnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. ⁵Y canye travisiayá, ínÿenga jáyèñjanama, canye soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶Chë jajañe trabajayá derecho jtsebomnana chë natsaná jtsemnama, chë tmojatbaná sananguentsána ndayánaca jtsebomnama. Acaftaca cachcá echanjopása, chë trabajo tšabá chacojamëse. ⁷Chë cbontsatsëtsnañe cochtsenójuabnaye, y Bèngbe Utabná echanjama lempe chacmósertama.

⁸Sempre cochtsenójuabnaye Jesucristbiama, ndabiama Bèngbe Bëtsá tojanma cháuatayenama y enjamna canya rey Davídbentšana entšá, ntšamo atše chabiama sëndabuayiyiná tšabe noticiènguiñe endmèncá. ⁹Chca abuayiyinaye causa, atše séntsesufrina, ñya cadenëjuangácnaca utsbuaná, mo canye bëts bacna soye ochjajnayacá. Pero masque atše chca séntsemna, chë Bèngbe Bëtsabe soyèngama buayenánana ínÿenga entšángbioye montsabatambá. ¹⁰Chíyeca atše ñyetsca padecena soyèngaca sëndëtsóboyana, Bèngbe Bëtsabe bocacánèngbe tšabiama, chéngnaca atsebácanènga chamotsemnama, Cristbeñe jtsošbuáchiyëse; y Cristo Jesús bëtsétsanga cháuabiamama, y cháftaca ñyetsca tescama chamotsiyenama.

¹¹Mëntšá ndegombre endmëna: Cristo Jesús tojanóbana ora, enjamna mo béngnaca

cuafjobancá, er bènga tmontsajbaná oyenana ntšamo tempo monjanियencá y Jesucristbeñe montsošbuaché; y chca, béngnaca cháftaca mochantsiyena;

¹²bènga chë padecena soyèngaca tmojtsesufrina ora, tmojtsemorochëse, béngnaca Jesucristoftaca mochántsemandaye.

Bènga tmojayana, cha ndoñe monduabatma ca, as cha bèngbiámna cachcá echanjajana;

¹³bènga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinñanyñayëse.

Canye trabajayá, ndáftaca Bèngbe Bëtsá jtsóyejuayana

¹⁴Chë tcbonjauyana soyèngama, cochjama chë entšanga chamotsenójuabnama, y Bèngbe Bëtsabe delante cochjábuaenaye chënga ndoñe yontsamna ñye palabrèngama jabuachana enatsëtsnayana; er chca, ndocna tšabe soye ntjamana, y chca tmojtseñatsëtsná ora, jamana chë soye ouenanènga más batšá chamotsošbuáchema, y jujabuáchana chéngbe tšabe juabnènga jtsondbiamama. ¹⁵Lempe ntšamo icobencá cochtsama, aca chacotsemnama mo canye entšá ndabiama Bèngbe Bëtsá cháuyana ñyetsca soyènguiñe tšabá amá yomna ca; aca chacotsemnama mo canye trabajayacá, nda tondaye tontsebomna ndayama jatëuatjama; y chacotsemnama chë ndegombre

buayenánana corente tšabá
 buatëmbayá. ¹⁶Entšanga nÿe quem
 luarentša soyëngama, ndoservena
 palabrënga tmojtsencuénta ora, chë
 soye ndoñe cattsuena; er chë soye
 jamana entšanga puerte inÿetšá
 chamobocanama, ntšamo Bëngbe
 Bëtsá ndoñe yondmëncá, inÿetšá
 jtsejuabnayëse y jtsamëse. ¹⁷Chëngbe
 buatëmbana soyëngaca puerte bacá
 inÿengbioye jáborlana, nÿa mo canÿe
 uabouana šocana chamotsebomnama
 cuafjamcá. Chca buatëmbayënguentšë
 Himeneo y Fileto bontsemna. ¹⁸Chata
 chë ndegombre benachentšana
 tbojtsujuánañe, y ibojtsichamo
 chë obanënga chámuatayenama
 Bëngbe Bëtsá ya catënjama ca, y
 Jesús chaojésabo ora, nÿetscanga
 chámuatayenama Bëngbe Bëtsá ndoñe
 yochanjama ca. Chë causa, chata
 bontsama básefta entšanga chë ntšamo
 Jesucrístbeñe imojanošbuachecá, mora
 ya ndoñe chamondëtsošbuáchema.
¹⁹Pero Bëngbe Bëtsabe ndegombre
 buayenánana nÿets tempo cachcá
 endesomñe, y ndocná quenátobena
 chë soye jatrócama. Chca endmëna
 mo chë ndëtšbënga ndayiñe canÿe
 bëts yebna tojebncá, ndayiñe
 mëntšá yojtsábemana: “Bëngbe
 Utabná endëubuatma chë chábënga
 imomnënga”, y “Nÿetscanga chë
 Bëngbe Utabnábënga imomnënga
 ca tmojtsichámënga, chamuajbaná
 nÿetsca bacna soyënga amana ca”.

²⁰Canÿe uámana entšabe yebnentšë,
 tsafjoca soyënga ndoñe nÿe castellano
 o midio soyënga ntsemnana, ndayá
 niñëse y fshantse soyëngnaca; chë
 natsana soyënga uámana tescama
 jtsebuájonana, pero chë inÿe soyëngna,
 nÿe nÿets tempo chauetsoservénama.

²¹Chca endmëna chë Jesucrístbeñe
 imojtsošbuachëngbeñe, ndoñe

nÿetscanga tmontsajbaná bacna
 soyënga juabnayana y amana, ni chë
 chca tmojtsama entšángbentšana
 ndoñe tmontsojuaná. Pero,
 chca jtsojuánañama tojtsebošá,
 echántsemna canÿa Bëngbe
 Utabnabiama tšabe trabajayá; y
 chca, mo chë tsafjoca castellano
 y midio soyëngcá, canÿe uámana
 trabajuñe echanjosérvia, y cha sempre
 echántseprontana ndaye tšabe soye
 jamama.

²²Chíyeca, ntšamo básefta
 bobontsënga bacna soyënga jamama
 mondbošcá, ndoñe cattsama; pero
 añe cochtsiyena ntšamo Bëngbe
 Bëtsabe bominiñe tšabá yomncá
 jtsamëse, Jesucrístbeñe puerte
 cochtsošbuáchiye, Bëngbe Bëtsá
 y inÿenga cochtsababuánÿeshana
 y nÿetscángaftaca
 natjëmbana cochtsomñe, chë
 chaújabuachama Bëngbe Utabná
 mondbetsotsëmbuanëngaftaca
 cánÿiñe, ndocna bacna soye
 ainaniñe ntsebomncá. ²³Ndoservena
 soyëngama palabrënga y
 ndosertánentšana óbocana soyëngama
 ndoñe cattsuena; aca corente
 condétatšëmbo chë soyënguentšana
 entšanga nÿe jabuachana
 enatsëtsnayiñe jabocanana. ²⁴Pero
 chë Bëngbe Utabnabiama oservená
 ndoñe quebnátsmëna inÿengaftaca
 jabuachana ntsenatsëtsnayana; chamna,
 cha bontsemna jtsababuánÿeshanëse
 nÿetscanga jtsëñÿayana, jtsemnana
 tšabe buatëmbayá y inÿengaftaca
 uantadá. ²⁵Cha bontsemna, chë
 chabe contra y chabe buayenánama
 contra imomnënga, chë ndegombre
 soyënga jabuátambama, pero ndoñe
 ntjatenabotamnaycá. Chca bontsemna,
 nderado Bëngbe Bëtsá nanjama chca
 juabnayana chamotrocama, y chca,

chënga chë ndegombre soyëngama chamotsetatšëmbuama; ²⁶ chënga botamana chamuatsjuaboma, y Bëngbe Bëtsá, Satanásbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

**Ntšamo entšanga mochtsemna,
Cristo jésabama chaojtsobeco ora**

3 ¹ Pero aca cmontsemna jtsatetšëmbuana, Cristo jésabama tempo chaojtsobeco ora, entšanga echántsamna puerta padecena soyënguiñe jtsiyenana. ² Chca echántsemna, er entšanga, cada ona nÿe cachabe tšabiana echanjésenojuabnaye, crocénana jtsebmnama tša mochántseboše, mochántsemna enábotamnayënga y ínÿengbiöye mo nduamanëngcá mochantsënÿaye. Bëngbe Bëtsabiana y ínÿengbiana bacá mochantsóyebuambnaye, chëngbe bëtsétsangbiöye ndoñe quemochátayaunana, ni chëngbiana tšabe soyënga tmojtsamëngbiöye quemochtëtacheuanaye, y Bëngbe Bëtsabiana y chabe soyëngama ndoñe respeto quemochátsbmna, ³ ni cachëngbe pamíllangbiöye quemochátababuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotënënga. ⁴ Chënga, uayayëngbe cucuatšëne entšanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye;

chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

⁵ Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchemá.

Nÿa tondayama chëngaftaca cattsencuëntaye. ⁶ Chënguentšë báseftanga mondmëna, y chëngna botamana palabréngaca yebnënguenache jamahjñana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchemá. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá. ⁷ Chënga nÿets tempo nÿe ndaye tsëm soye jatóntsana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebmnama, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entšanga jáyëñanama, er nÿetsca entšanga mochanjátatšëmbona chënga nÿe bacna soyënga juabnayënga imomnama, mo chë Israeloca entšanga tmojantatšëmboncá Janes y Jambres nÿe chca juabnayata bëtsemnama.

Inÿe soye Timotéobioye tbojanbonÿé

¹⁰ Pero acna, puerte tšabá condétatšëmbo ntšamo atše tijabuatambacá, ntšamo jtsamése atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, ¹¹ ínÿenga šmonjanacmena ora; y sënjansufrina ora, padecena soyënguñe bëts añemo tsjánbomna. Acnaca condétatšëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá. ¹² Ndegombre endmëna, nÿetscanga chë Bëngbe Bëtsá jadórana soyënga jtsamése jtsiyenama bošënga, y Cristo Jesuſeftaca canÿiñe mo canÿacá imomnënga, puerte mochanjasúfria, chca bëtsemnama, chënga chamosufrima ínÿenga chamojtsama ora; ¹³ pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamése; chënga ínÿengbioye mochántsaingñaye, pero cachëgnaca ingñënënga mochántsemna.

¹⁴ Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtssošbuácheñe, er ca tšabá condëubuatma chë tcmojanbuátëmbanga; ¹⁵ y aca, cabá bášetema conjamna orscana, chë Bëngbe Bëtsabe uabemana palabrengama condétatšëmbo,

chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse. ¹⁶ Bëngbe Bëtsá, Uámama Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamése; ¹⁷ chca, canÿe entšá Bëngbe Bëtsabiamama oservená y obená chaotsemnama, tšabá chaotsetatšëmbo y sempre chaotseprontana nÿetsca tšabe soyënga jtsamama.

4 ¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguñe tmojftsemcá tšabá o ndoñe tšabá bëtsemnama, chatbe delante cbomandá, ² Bëngbe Bëtsabe palabra entšanga chacotsabuayinayama; siempre chca jamama cochtseprontana, masque entšanga añe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Siempre chca cochtsabuátambaye, chca ora puerte uantado jtsemnëse. ³ Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana;

chamna, n̄e ch̄e último ts̄em soȳenga jts̄etat̄s̄embuama bōše causa, ba abuátambaȳenga mochanjuánguango, y ch̄enga mochánt̄sichamo soȳenga n̄e nt̄samo cach̄ ent̄sanga jouenama tmojt̄sebošcá. ⁴Ch̄enga ch̄e ndegombre soȳenga ndoñe quemochátuenana, y n̄e ndaye cuent̄enga mochánt̄seyeunana. ⁵Pero aca, sempre botamana cocht̄sejuabnaye; ch̄e padecena soȳengama chacojts̄esufrina ora, añemo cocht̄sebošcá; ch̄e Jesucrist̄biama ts̄abe noticīenga ent̄sanga abuaȳinayabe trabajo cocht̄sama; y n̄ya cocht̄sent̄šena ndayá B̄ngbe B̄tsá tcmojabon̄yecá ts̄abá jts̄amama.

⁶Er mo B̄ngbe B̄tsábioye j̄ts̄chuayama, can̄ye bayá obanáf̄taca tcojabuešc̄ja vín̄oye jts̄opochocancá, cachcá at̄šbe vídnaca ya jopochócama entsemna. At̄še jób̄anama bécoñe entsemna; chanjób̄ana ora echánt̄semna B̄ngbe B̄tsá oyejuayá chaotsemnama.

⁷Cristo Jesusbe soȳengama corente s̄enj̄enojuerzá. Mo can̄ye travisiayacá, ch̄e jashjanguama yomna luaroye ya tojashjangcá, át̄šnaca ya, nt̄samo B̄ngbe B̄tsá yobošcá at̄še jts̄am̄ese, at̄šbe trabajo ya tijapochocá. At̄še n̄yets tempo Jesucrist̄beñe s̄endošbuaché.

⁸Chcasna, at̄šbiama can̄ye uacanana soye echánt̄semna, er B̄ngbe B̄tsá tojama at̄še chabe bomin̄ȳiñe ts̄abia chaitsemnama. B̄ngbe Utabná endm̄ēna ch̄e ndegombre ts̄abá ichamuá ent̄sanga aĩñe o ndoñe ts̄abá tmonjamama, y cha ch̄e uacanana soye šochánt̄at̄š̄etaye, ent̄sanga nt̄samo tmojamama cha chaojabáyana ora. Pero cha n̄ye at̄še ndoñe ch̄e uacanana soye quešocht̄t̄at̄š̄etaye, ndayá n̄yetscángbioye chca, nd̄emuan̄ȳenga puerte imoboše cha cachiñe cháuesabama, cha imobobonshánayeca.

In̄ye soȳenga Timoteobiama

⁹Lempe nt̄samo tcojobenacá cochjama bet̄sco jabama at̄še jabín̄yama; ¹⁰er Demas, cha yapa n̄ye quem luarent̄ša ent̄sangbe soȳenga bošá enjamna, cha cachcá šonjeson̄yá y Tesalónica puebl̄oye tojt̄soñe. Crescente Galacia luaroye tonj̄a y Tito Dalmacia luaroye. ¹¹N̄ye Lucas, ch̄e šmonjanájabuachan̄enguent̄šana, mora át̄š̄eftaca entsemna. Marcos cochj̄afts̄enguango y ácaftaca cochj̄ēts̄bet̄še, er cha at̄šbe trabajuama puerte oservená endm̄ēna. ¹²Tíquico, Efesoye s̄enj̄ichmó. ¹³Chacoj̄abo ora, uabonjanía šcochjesac̄ñe, at̄še Troas b̄ets̄ puebloca, Carpbe yebnoca tij̄esaboshjona; ch̄e libr̄ēšangánaca, pero ch̄e uámana uabemana ts̄buanachangá ndoñe chacmond̄ēt̄sebnat̄j̄emba.

¹⁴Alejandro, ch̄e cobre soȳenga pormayá, puerte bacá šonjaborlá. B̄ngbe Utabná bochanj̄acast̄iga, nt̄samo at̄še šojaborlama. ¹⁵Chabiama cuedado cocht̄sebošcá; cha tojobenase nt̄šam̄naca cmat̄jabórla, er cha ch̄e b̄nga mondabuaȳin̄a soȳengama contra entsemna.

¹⁶Ch̄e natsana soyama, mándaȳngbe delante šonjanotocá jen̄éuyanama ora, at̄še ndocná chešn̄át̄anajabuache; n̄yetscanga cachcá šmonj̄eson̄yaye. Pero at̄še s̄ents̄obát̄mana, B̄ngbe B̄tsá chama ch̄enga chaotsaperdoná. ¹⁷Pero B̄ngbe Utabná aĩñe šonjanájabuache y tonjanma at̄še b̄ets̄ añemo jt̄sebošcá, y chcase, at̄še s̄enjanobená Jesucrist̄biama n̄yetsca chabe ts̄abe noticīenga ent̄sanga jábuayenama, y ch̄e luarent̄ša ndoñe judīenga tmonjanobená ch̄e soye jouenama. M̄ēnt̄šá,

Bëngbe Utabná canye uabouana resjuentsana šonjanatsbocá, mo canye león jtsosañámentšana ndábioye cuafjatsbocá, ¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjesbetše. iNÿetscanga nÿetsca tescama cha chamotsatschuaná! Chca chaotsemna.

Pablo Timotéobioye jadiósoftanama

¹⁹ Atšbe cuenta cochjácheuaye Prisca y Aquila, y Onesíforbe

pamílnaca. ²⁰ Erasto, Corinto puebloca tontsoquedañe, y Trófimo Mileto puebloca šocá sënjëftseboshjona. ²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

²² Atše séntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.